

## **Стихиры Сретения Господня на стиховне, глас 7:**

**Ныне отпускаеши раба Твоего, Владыко, // по глаголу Твоему, с миром.**

Возсиявшего прежде век от Отца, / напоследок же от ложесн Девических / носящи в церковь неискусобрачная Мати, / в Синайстей горе Законоположившаго, / повелению законному повинующаяся / принесе святителю старцу и праведнику, / Христа Господа видети обещаंना. / Егоже приемъ Симеон на руки своя, возрадовася, вопия: / Бог есть Сей, Отцу Соприсносущный, // и Избавитель душ наших.

**Свет во откровение языков//и славу людей Твоих Израиля.**

Носимаго на колеснице Херувимстей / и певаемаго в песнех Серафимских / носящи на руку Богородица Мария, / неискусобрачно из Нея воплощшагося, / Законодавца, закона исполняюща чин, / подающе рукам старца иерея. / Живот же носяй живота прошаше разрешения, глаголя: / Владыко, ныне отпусти мя возвестити Адаму, / яко видех непреложна Отроча, Бога Превечнаго // и Спаса мира.

**Слава, и ныне, глас 8:**

Иже на Херувимех носимый и певаемый от Серафим, / днесь в Божественное святилище по закону приносим, / на старческих, яко на престоле, сидит руках / и от Иосифа приемлет дары Боголепно, / яко супруг горлицищ, / нескверную Церковь и от язык новоизбранныя люди, / голубина же два птенца, / яко Начальник Ветхаго же и Новаго. / Еже к нему обещания Симеон конец прием, / благословя Деву Марию Богородицу, / страстей образы, Иже из Нея, провозгласи / и от Него прошаше отпущения, вопия: / ныне отпусти мя, Владыко, / якоже прежде возвести ми, / яко видех Тя, Первовечнаго Света // и Спаса Господа христоименитым людем.